

## GWEDDI EWCHARISTAIDD 4



Yr Arglwydd a fo gyda chwi -  
**A chyda thithau.**

Dyrchafwn ein calonnau -  
**Yr ydym wedi'u dyrchafu at yr Arglwydd.**

Diolchwn i'r Arglwydd ein Duw -  
**Addas a chyfiawn ydyw.**

*Rhaglith*



Gwir addas yw diolch i ti,  
 gwir gyfiawn yw dy ogoneddu di,  
 Dad sanctaidd,  
 oherwydd ti yw'r unig wir Dduw byw,  
 yn bod cyn yr oesoedd, ac yn aros yn dragywydd,  
 ac yn trigo yn y goleuni na ellir dyfod ato.  
 Ti yw unig ffynnon bywyd a daioni,  
 a wnaeth bob peth  
 er mwyn rhoi cyflawnder dy fendithion i'th greaduriaid  
 a'u llawenhau i gyd â goleuni dy ogoniant.  
 Gan hynny, mae tyrfa ddirifedi'r angylion  
 yn sefyll ger dy fron  
 ac yn dy wasanaethu ddydd a nos,  
 a chan edrych ar ogoniant dy wyneb  
 maent yn dy ogoneddu'n ddi-baid.  
 Ninnau hefyd gyda hwy,  
 a thrwom ni bob creadur dan y nef,  
 clodforwn dy enw gan ganu:  (ddweud: )

**Sanctaidd, Sanctaidd, Sanctaidd,  
 Arglwydd Dduw'r lluoedd.  
 Mae'r nef a daear yn llawn o'th ogoniant.  
 Hosanna yn y goruchaf.  
 Bendigedig yw'r hwn sy'n dod yn enw'r Arglwydd.  
 Hosanna yn y goruchaf.**

Clodforwn di, Dad sanctaidd, oherwydd mawr wyt ti,  
a gwnaethost bob peth mewn doethineb a chariad.  
Lluniaist ddyn ar dy ddelw dy hun a rhoddaist yr holl fyd yn ei ofal,  
fel, wrth dy wasanaethu di yn unig, y Creawdwr,  
y byddai iddo lywodraethu ar bob creadur.  
Hyd yn oed pan gollodd dy gymdeithas di trwy anufudd-dod,  
ni chefnaist arno na'i adael yng ngallu marwolaeth.  
Oherwydd yn dy dosturi, rhoddaist gymorth  
i bob dyn i'th geisio di a'th gael.  
Dro ar ôl tro, yr wyt wedi cynnig cyfamod i ddynion  
a'u dysgu trwy'r proffwydi i ddisgwyl gwaredigaeth.

Ac felly, Dad sanctaidd, y ceraist y byd  
fel, yng nghyflawnder yr amser,  
yr anfonaist dy unig-anedig Fab yn Waredwr inni.  
Daeth yn ddyn trwy nerth yr Ysbryd Glân  
a'i eni o Fair Forwyn,  
a byw fel ninnau ym mhob peth, eto heb bechod.  
I'r tlodion cyhoeddodd efengyl iachawdwriaeth, i'r caethion ryddid,  
a llawenydd i'r rhai ysig o galon.  
Er mwyn cyflawni dy arfaeth, fe'i traddododd ei hun i farwolaeth,  
a chan atgyfodi o feirw, fe ddinistriodd angau ac adnewyddu bywyd.  
Nid oeddem mwyach i fyw i ni ein hunain,  
ond iddo ef a fu farw a chyfodi drachefn er ein mwyn.

Ac felly anfonodd ef oddi wrthyt ti, O Dad,  
yr Ysbryd Glân yn flaenffrwyth i'r rhai sy'n credu,  
i gyflawni ei waith yn y byd,  
ac i berffeithio pawb mewn sancteiddrwydd.

Gan hynny, Arglwydd, erfyniwn arnat,  
bydded wiw gan yr Ysbryd Glân sancteiddio'r rhoddion hyn,  
fel y byddant yn gorff ✠ a gwaed ein Harglwydd Iesu Grist,  
i weithredu'r dirgeledd mawr hwn  
a adawodd i ni yn gyfamod tragwyddol.



Oblegid pan ddaeth yr awr i'w ogoneddu gennyt ti,  
Dad sanctaidd, a chan iddo garu ei bobl a oedd yn y byd,  
fe'u carodd hwy hyd y diwedd;  
a thra 'roeddent yn swpera, fe gymerodd fara,  
a chan ei fendithio, fe'i torrodd a'i roi i'w ddisgyblion, gan ddweud:



**CYMERWCH, BWYTEWCH OHONO BAWB:**  
**HWN YW FY NGHORFF A RODDIR DROSOCH.**



Yr un modd, wedi bwyta,  
cymerodd y cwpan rhagorol hwn yn ei ddwylo sanctaidd,  
a chan ddiolch i ti a bendithio drachefn,  
fe'i rhoddodd i'w ddisgyblion, gan ddweud:



**CYMERWCH, YFWCH OHONO BAWB:**  
**HWN YW CWPAN FY NGWAED**  
**O'R CYFAMOD NEWYDD A THRAGWYDDOL,**  
**A DYWELLTIR DROSOCH CHWI A THROS BAWB**  
**ER MADDEUANT PECHODAU.**  
**GWNEWCH HYN ER COF AMDANAF.**



Dyma ddirgelwch y Ffydd:

**1 Cyhoeddwn dy farwolaeth, Arglwydd,  
addefwn dy atgyfodiad nes i ti ddod.**



*Neu:*

**2 Bob tro y bwytawn y bara hwn ac yfed y cwpan,  
cyhoeddwn dy farwolaeth, Arglwydd, nes i ti ddod.**

*Neu:*

**3 Iachawdwr y byd, iachâ ni;  
trwy dy groes a'th atgyfodiad, yr wyt wedi ein rhyddhau.**



Gan hynny, Arglwydd, yr ydym ninnau,  
wrth wneud coffâd yn awr o'n prynedigaeth,  
yn dwyn i gof farwolaeth Crist a'i ddisgyniad i blith y meirw,  
ac yn cyhoeddi ei atgyfodiad a'i esgyniad at dy ddeheulaw di;

ac wrth ddisgwyl ei ddyfodiad mewn gogoniant,  
 yr ydym yn offrymu i ti  
 ei gorff a'i waed yn aberth cymeradwy er iachawdwriaeth i'r holl fyd.

Edrych, Arglwydd, ar yr aberth hwn a baratoaist dy hun i'th Eglwys,  
 ac o'th ddaioni dyro i bawb a fydd yn cyfranogi  
 o'r un bara a'r cwpan hwn  
 gael eu cydgynnull oll yn un corff gan yr Ysbryd Glân,  
 a'u gwneud yng Nghrist yn aberth byw er mawl i'th ogoniant.

- ① Ac yn awr, Arglwydd,  
 cofia bawb yr ydym yn offrymu'r aberth hwn drostynt,  
 yn enwedig dy was **E.**, ein Pab, ein hesgob **E.**,  
 a holl urdd yr esgobion, yr holl offeiriad,  
 y rhai sydd yma'n gweinyddu yn y gynulleidfa hon, a'th holl bobl,  
 a phob un sy'n dy geisio â chalon ddidwyll.



Cofia hefyd y rhai a fu farw yn nhangnefedd Crist,  
 a'r meirw oll yr oedd eu ffydd yn hysbys i ti yn unig.

- ② Caniatâ, Dad trugarog, i bawb ohonom ni, dy blant,  
 gyrraedd ein hetifeddiaeth nefol yn dy deyrnas,  
 gyda Mair y Forwyn fendigaid, Mam Duw,  
 a'r bendigaid Joseff hefyd, ei phriod, ynghyd â'r apostolion a'r saint.  
 Yno, a'r holl greadigaeth wedi ei rhyddhau  
 oddi wrth lygredigaeth pechod a marwolaeth,  
 fe'th ogoneddwn di trwy Grist ein Harglwydd,  
 yr wyt trwyddo'n rhoi pob daioni i'r byd.



Trwyddo ef, a chydag ef, ac ynddo ef,  
 y mae i ti, Dduw Dad Hollalluog,  
 yn undod yr Ysbryd Glân,  
 bob anrhydedd a gogoniant yn oes oesoedd.



Amen.

R. A-men.